

զուրկներին, աղատութիւն՝ ճնշուածներին. ու
յանուն այդ սկզբունքների ոտքի հանել ուրիշ-
ների հետ եւ մի փոքրիկ ժողովուրդ, հայ ժո-
ղովուրդը — համակ յոյս, հաւատ ու աննենգ
կորով — ապա նրան լքել իր արիւնարբու թըշ-
նամու կատաղութեանը — սա փաստ է, որ
անցնում է հայկական շահերից եւ դառնում է
համաշխարհային մորալի ու խղճի խնդիր:

Եւ այս է պատճառը, որ Հայաստանը,
այս վերաւոր, արնաքամ, կողոպտուած, տը-
րորուած Հայաստանը մնում է սպառնալի ու
դարզանդոտ:

Անհնարին է որեւէ անուն արտասանել ա-
ռանց սարսուռի, եթէ դեռ հոգի կայ:

Լոյտ Ջորջի այն խօսքերը, թէ թիւրքը ի-
րեն յանձնուած ազգերի «վատթար պահապան
եղաւ», այսօր կարելի է դարձնել բոլոր Դաշ-
նակիցների, բոլոր, բոլոր ազգերի դէմ: Նրանք
ամէնքն էլ վատ, «չատ վատ պահապան եղան»
դարերից ժառանգութիւն հասած քաղաքակը-
թական բարձր սկզբունքներին. եւ դաւեցին
մարդկութեան իդէալին:

Ինչո՞ւ դարմանալ, որ այսօր յոգնած ու
հիասթափուած ժողովուրդները նոր պահա-
պաններ, նոր վարիչներ են փնտռում աշխարհն
ու պատմութիւնը դեկավարող նուիրական
սկզբունքներին:

Հաւատն է մեռել դէպի քաղաքակիրթ
մարդկութեան խղճմտանքը:

Տառապողներն ու ճնշուածները նոր եւ
աւելի արդար, աւելի զգայուն, աւելի մաքուր
խղճմտանքն են փնտռում:

Այստեղ է գաղտնիքը մեր օրերի այս ան-
դադրում ու կրքոտ եռուզեռին, որ ոչինչ չի
թողնում կայուն ու ապահով: Ամէնքը եւ ա-
մէն ինչ գաղափարական թէ նիւթական աշ-
խարհում՝ անապահով են ու մաղից կախ-
ուած:

Ազգերի հասարակական կեանքն ընթա-
նում է վտանգաւոր ցնցումներով. ոչ ոք վըս-
տահ է, թէ իր ընտրած ուղին վերջնական է:

Եւ ուղիները խաչաձեւում են իրար:

Պատմութեան մէջ յանցանքներ կան, ո-
րոնց արձագանգը յետագայ դարերի մէջ է
դրնդում:

Դաշնակիցները կարծեցին, թէ ոչինչ բան
է ուրանալ Հայաստանը:

Յեղային վատթար եսասիրութիւնը, յա-
րաճուն ընչաքաղցութիւնը աւելի հզօր եղաւ
քան պարզ արդարութեան զգացումը:

Ի՞նչ է Հայաստանը. Առաջաւոր Ասիայի
մի լեռնոտ անկիւնում կորած մի երկիր, ուր
ապրում է մի բուռն ժողովուրդ՝ արնաքամ ու
խոշտանդուած:

Ո՞վ կը լսի նրա բողոքի ձայնը:

Ո՞վ հաշիւ կը պահանջի նրա համար:

«Եկա՛յք, սպանցուք դարդարն»...

Եւ ուրացան Հայաստանը:

Հսկայ պետութիւններ, որոնց դրօշակին
դիպուածով կամ յիմարօրէն նետուած մի քար
կարող է մի նոր պատերազմի ու սրածուլթեան
ազդանշան համարուել, չի հասկացան, ու Հա-
յաստանին դաւելը մեծադոյն նախատինքն է ի-
րենց դրօշակին, որի պատիւը սերտօրէն կապ-
ուած է իրենց երդումի ու իրենց պատույ խօս-
քի հետ:

Ամէն անգամ, որ որեւէ պետական մարդ
այսուհետեւ արտասանի «ազգային դրօշակի
պատիւ» խօսքերը, ամէն ոք իրաւունք ունի
ճշալ՝ «ապա Հայաստանը»...

Այս էր, որ մոռացուեց:

Եւ պատիժը չուշացաւ:

Հայաստանը լռեց:

Նա անզօր էր ու պարտասած:

Նա լռեց իր արցունքն ու ցատումը կուլ
տալով. բայց մի գերագոյն ու անձանօթ ար-
դարագատութիւն Հայաստանը լքող պետու-
թիւնների ճամբին հանեց հարիւրաւոր ցեղեր:
Մարօկոից մինչեւ Եգիպտոս ու Սիւրիա.
Հնդկաստանից մինչեւ Շանխայ ու Մոնղոլիա
բոլոր ցեղերի եռուզեռն ու փոթորկումները
կատարուում են յանուն Լօզանի դաշնագրի:

Մուստաֆա Բեմալ Ղազի — յաղթական է
ոչ միայն թիւրքերի համար, այլ եւ Ասիայի ու
Աֆրիկայի բոլոր խաթամութների համար: Քե-
մալիզմը մի մօզել է, որի վրայ այդ ցեղերը
չափում ու ձեւում են իրենց ազգային իդէալին
հասնելու մեթոտները: Քեմալիզմի ոգին է ա-
ռաջնորդում այդ ըմբոստացած խուժանները.
նա է զինում բազուկները պետութիւնների դէմ